

11 MAY 1996

Mahathir - Masyarakat

MISKIN, KAYA BUKAN BERMAKNA TIDAK ADIL

KUALA LUMPUR, 11 Mei (Bernama) -- Adanya orang miskin dan orang kaya dalam sesuatu masyarakat tidak bermakna ketidakadilan berlaku, kata Perdana Menteri Datuk Seri Dr Mahathir Mohamad hari ini.

"Ketidakadilan berlaku hanya jika yang kaya terlalu kaya dan yang miskin terlalu miskin sehingga tidak dapat hidup sempurna," katanya ketika berucap pada Konvensyen Ulangtahun Umno ke-50 di Pusat Dagangan Dunia Putra di sini.

"Dalam demokrasi biasanya yang kaya dikenakan cukai yang tinggi yang digunakan untuk membantu yang miskin. Dengan itu ketidakseimbangan dalam masyarakat dapat dikurangkan," kata beliau.

Dr Mahathir, yang juga Presiden Umno, berkata masyarakat biasanya berpendapat bahawa yang miskin tidak mungkin bersalah walaupun jelas tindakan mereka tidak adil dan merosakkan keadaan masyarakat.

Sebagai contoh, beliau berkata jika orang yang miskin memasuki tanah milik pemerintah atau milik orang yang berada, perbuatan itu dipertahankan oleh masyarakat sebagai tidak salah.

"Tindakan untuk mengeluarkan mereka dan mengambil balik tanah dianggap tidak adil. Jika pampasan dibayar sekalipun dan mereka masih enggan keluar daripada tanah berkenaan, simpati masyarakat terhadap mereka masih kekal.

"Pejuang-pejuang keadilan akan mempertahankan golongan yang miskin atau yang dianggap miskin ini tanpa mengambilkira adil tidak adil, baik tidak baik perbuatan mereka," katanya.

Pendapat bahawa yang miskin juga boleh berlaku tidak adil tidak mudah disuarakan, kata Dr Mahathir.

Beliau berkata masyarakat masih ingin menyamakan kemiskinan dengan penganiayaan dan kekayaan dengan penindasan dan penipuan.

"Keadilan tidak akan tercapai selagi ada anggapan bahawa kesalahan yang sama oleh dua pihak yang berlainan tidak boleh diberi hukuman yang sama," katanya. -- BERNAMA

AZZ AKD